

La Frantscha tschertga in president

Ils 7 da matg s'avischina

DA GUIU SOBIELA-CAANITZ

■ **Dumengia, ils 7 da matg elegia la Frantscha (66,9 milliuns olmas) ses president u sia presidenta. Cun la differenza da zona d'urari succeda quai gia la sonda, ils 6 da matg en la Polinesia franzosa ed ils territoris franzos en America.** L'emprim scrutini sa splega duas emnas oravant, ils 23 d'avrigl, pia la Dumengia alva da la baselgia catolica; ma quel di na vegn nagina da las indesch persunas che candideschan a survegnir la maiorità assoluta da las vuschs. Pir ils 5 u 6 da matg din electuras ed electurs tgi che duai presidiar il pajais durant ils proxims tschintg onns. L'unica dunna candidata, Marine Le Pen (*1968, «Front National», FN) vegn segir a candidar per il segund scrutini. Ses adversari vegn a survegnir las vuschs da quella part da l'electorat che na vul betg sco presidenta la scheffa da la dretga extrema. Las megras vistas da triumfar cunter «Marine» avess l'anteriu minister Emmanuel Macron (*1977), in economist che na para d'enconuscher uschè bain la geografia dals territoris franzos d'ultramar en America; sias confu-

siuns pudessan permalar votantas e votants da quels pajais.

La Frantscha metropolitana (535 261 km² e strusch 64 milliuns olmas senza la Corsica) è limitrofa da la Svizra sin in cunfin da 573 km, sco era da tschintg pajais commembers da l'Uniun europeica e da l'Allianza atlantica. La lingua franzosa dominescha en l'Africa dal vest.

La Frantscha sustegna il Mali (1 240 192 km², 17,6 milliuns olmas) cunter l'extremissem islamic. Il politolog Christian Lequesne punctuescha en «La Liberté» (Friburg) dals 27 da mars: «I sa tracta d'ina sfera d'influenza privilegiada da mintga regenza [franzosa] da la dretga u da la sanestra (...). Cun la smanatscha terroristica lubescha l'imperativ da segirtad da legitimar la lavur da 'polizia' che la Frantscha presta en lezza regiun.» La Frantscha è intervegnida dacurt en Irac, Libia, Siria e la Republica centrafricana, plinavant diplomaticamain en Ucraina. Areguard il linguatg commentescha la gassetta: «Var 170–220 milliuns umans èn francofons. Quai munta pauc dapli che 3% da la carstgaunadad. Questa proporziun crescha grazia a la natalità africana.»



Entrada dal Palaz Elyssée, la sedia dal president da la Republica. MAD